



JABATAN PERKHIDMATAN VETERINAR MALAYSIA

LAPORAN LIPUTAN MEDIA

Isnin, 17 Oktober 2022	
1	Syarikat gergasi 'sedut' subsidi
2	Tiga pemuda bahagia ditemani sibulus
3	Harga ayam naik RM1 sejak seminggu lalu
4	Amaran Menteri kepada pengeluar telur
5	Pemborong cas 60 sen bagi sepapan telur ayam disiasat
6	LPP terus atur strategi pembangunan

DISEDIAKAN OLEH :
**SEKSYEN KOMUNIKASI KORPORAT,
JABATAN PERKHIDMATAN VETERINAR MALAYSIA**

Syarikat gergasi 'sedut' subsidi

Oleh FAHMI FAIZ
utusannews@mediamula.com.my

PETALING JAYA: Beberapa syarikat gergasi ternakan ayam didakwa berkomplot 'menyembelih' penternak kontrak kecil-kecilan dengan mengaut hampir semua peruntukan subsidi yang disalurkan kerajaan kepada industri tersebut.

Dengan kadar subsidi 10 sen bagi seekor ayam untuk

Penternak kecil berisiko gulung tikar, dibayar 10 sen seekor ayam

kategori kontrak kecil-kecilan berbanding 70 hingga 80 sen seekor bagi kategori persendirian dan bersepadu (integra-

tor), penternak kecil menjangkakan mereka tidak akan mampu meneruskan operasi dalam industri berkenaan.

Sumber persatuan penternak dari dua negeri mendedahkan kepada *Utusan Malaysia*, satu kertas kerja yang didakwa cadangan penyaluran subsidi mengikut kategori persendirian, bersepadu dan kontrak menunjukkan elemen 'meragukan' apabila bayaran subsidi

kepada penternak ayam kontrak terlalu rendah berbanding untuk kategori persendirian dan integrator.

"Dalam kertas kerja itu, difahamkan bayaran subsidi untuk September kepada penternak persendirian berjumlah 80 sen bagi seekor ayam. Bayaran kepada penternak bersepadu pula, 70 sen."

Bersambung di muka 2

Syarikat gergasi 'sedut' subsidi

Dari muka 1

"Tapi yang peliknya, bayaran subsidi kepada kami penternak kontrak ini pula, cuma 10 sen. Apa sebab penternak persendirian dan integrator dapat sejumlah besar peruntukan, tapi kami yang penternak kontrak cuma dapat 10 sen," soal sumber itu di sini, semalam.

Kementerian Pertanian dan Industri Makanan (MAFI) dalam satu kenyataan 9 Oktober lalu menyebut, Jemaah Menteri pada 7 Oktober bersetuju supaya pemberian subsidi kepada penternak ayam dan pengeluaran telur ayam diteruskan dari Oktober hingga Disember 2022 pada kadar RM0.80 sekilogram bagi ayam dan RM0.08 bagi sebiji telur.

Keputusan itu mengambil kira harga siling ayam standard di peringkat runcit dikekalkan pada kadar RM9.40/kg dan harga siling telur ayam gred A, B dan C di peringkat runcit dikekalkan masing-masing pada kadar 45 sen, 43 sen dan 41 sen sebiji di Semenanjung Malaysia.

Ia juga bagi meringankan beban penternak susulan peningkatan kos yang berterusan terutama makanan ayam yang meliputi 70 peratus kos pengeluaran selain anak ayam, logistik, pekerja, utiliti dan ubat-ubatan.

Sumber berkata, susulan itu pihaknya menerima satu kertas kerja yang didakwa memperincikan jumlah bayaran subsidi ayam kepada pemain industri.

Katanya, dalam kertas kerja itu menyebut bahawa subsidi yang akan disalurkan kepada penternak kontrak cuma 10 sen, yang mana satu jumlah yang



PENTERNAK kontrak kecil-kecilan mendakwa mereka mendapat subsidi 10 sen bagi seekor ayam. - UTUSAN/AMIR KHALID

'sangat tidak masuk akal'.

"Mengambil kira kos yang kami tanggung selaku penternak kontrak, macam mana kami boleh bertahan dengan jumlah sebegini? Sedangkan pemain-pemain gergasi sama ada dalam kalangan penternak persendirian serta integrator pula menerima 80 sen subsidi untuk sekilogram ayam."

"Mereka ini adalah syarikat besar yang stabil, ada kewangan yang kukuh, mereka juga yang membekalkan anak ayam sehari serta makanan ayam kepada

penternak kontrak. Sudahlah mereka ini gergasi, diberi pula subsidi yang besar, habis matilah penternak-penternak kecil kalau macam ini," kata sumber.

Katanya, kerajaan perlu telus dan jujur menyalurkan subsidi, agar tidak menindas kumpulan penternak kecil yang bergelut dengan kenaikan kos.

Utusan Malaysia sudah menghubungi MAFI dan Jabatan Perkhidmatan Veterinar bagi mendapatkan komen, dan masih menunggu maklum balas.

Kucing baka British Shorthair jadi peneman hidup, pendengar setia golongan bujang Tiga pemuda bahagia ditemani si bulus

Oleh SITI A'ISYAH SUKAIMI

PETALING JAYA – Setiap individu mempunyai alasan mengapa masih belum menemui cinta hati, begitu juga tiga pemuda Mohd. Hafizuddin Abdul Rahman, 38, Wayne Ragaventhiran, 33, dan Cheong Yuen Wai, 36.

Bagi mereka, status bujang tidak memberi sebarang tekanan, malah kini bahagia ditemani kucing peliharaan baka British Shorthair.

Menceritakan minatnya, Mohd. Hafizuddin berkata, ia bermula apabila dia menemui seekor kucing domestik betina pada 2012 di sebuah balai polis dan membawanya pulang kerana kasihan melihat haiwan berkenaan.

"Minat untuk memelihara baka British Shorthair tercetus ketika membawa kucing itu menyertai pertandingan kucing kampung anjuran Kelab Kucing Malaysia pada 2013.

"Dari situ saya mengenali baka British Shorthair dan tertarik dengan badannya bulat, boleh berdiskari dan bulu pendek serta senang dijaga. Kini saya ada 24 ekor kucing baka ini termasuk seekor kucing domestik," katanya kepada Kosmo! baru-baru ini.

Setiap bulan, jurutera ini memperuntukkan kira-kira



YUEN WAI

RM1,300 untuk makanan dan keperluan kucing peliharaannya.

Menyentuh mengenai kehidupan peribadinya, anak kedua daripada enam beradik itu berkata, sebagai anak lelaki pertama, dia merasakan tanggungjawab memastikan adik-adik lain dapat menyambung pelajaran ditambah ketika itu arwah bapanya tidak lagi bekerja.

"Kini kesemua adik-adik saya telah habis belajar, sudah bekerja dan ada yang telah berumah tangga. Memang ada juga ibu 'bising' dan bertanyakan bila pula saya akan berkahwin.

"Secara fitrah semua orang mahu berpasangan tetapi dalam masa sama, saya fikir juga adakah seseorang itu boleh menerima



BIARPUN menuntut perbelanjaan yang tinggi, kucing juga disifatkan peneman ketika sunyi dan bertindak sebagai pendengar setia kepada sesiapa yang memeliharanya.

kucing-kucing saya dan tinggal serumah," ujarnya.

Dalam pada itu, rakannya, Wayne yang juga pengarah sebuah sekolah antarabangsa memberitahu, dia memelihara 25 ekor kucing British Shorthair dengan perbelanjaan antara RM2,500 hingga RM3,000 se-

bulan, manakala pemeriksaan veterinar antara RM500 hingga RM600.

"Perasaan seronok apabila balik rumah, kucing-kucing menunggu. Jika kucing beranak, saya akan tunggu dan sambut kelahiran itu, proses berkenaan memang menyeronokkan biar-

pun pengalaman menjaga anak kucing, bukannya sesuatu yang mudah," jelasnya.

Ditanya mengenai perkahwinan, anak sulung daripada tiga beradik itu belum memikirkan ke arah tersebut selain mahu memberi fokus kepada kerjaya, hobi serta perkara dan aktiviti yang diminatinya.

Sementara itu, luhuan sama disuarakan Yuen Wai yang juga ketua bahagian teknologi digital di sebuah syarikat yang memberitahu, dia kini bahagia dengan 13 ekor kucing British Shorthair dan memperuntukkan kira-kira RM2,000 sebulan bagi keperluan haiwan tersebut.

"Saya berpendapat menjaga kucing ini juga suatu amarah. Kita rasa ada matlamat hidup dan perlu bekerja keras mencari duit kerana terdapat 'anak-anak' di rumah yang memerlukan makanan.

"Saya adalah tempat kucing kucing bergantung hidup, jadi tanggungjawab saya menjaga si bulus ini dengan baik," ujarnya.



WAYNE memiliki 25 ekor kucing baka British Shorthair dan memperuntukkan hampir RM4,000 sebulan untuk haiwan tersebut.



MOHD. HAFIZUDDIN mahu wanita yang boleh menerima dirinya dan kesemua kucing peliharaannya.

Bujang bukan sebab tak laku, definisi bahagia berbeza

PETALING JAYA – Definisi bahagia pada masa kini berubah dan ditafsirkan dalam aspek lebih meluas berbanding 20 tahun lalu yang rata-ratanya merujuk kepada kebahagiaan apabila dikelilingi suami, isteri dan anak-anak.

Pensyarah Fakulti Kepimpinan dan Pengurusan (FKP) Universiti Sains Islam Malaysia (USIM), Dr. Farhana Sabri berkata, perkara itu bukan bermaksud

perkahwinan tidak diutamakan, namun kebahagiaan tidak khusus kepada membina rumah tangga sahaja.

"Kita hidup dalam dunia naratif yang mana interpretasi realiti itu tidak sama dengan 20 tahun dahulu. Sebagai contoh, seseorang melihat kebahagiaan apabila dia berbelanja.

"Dia beli air Starbucks dan kemampuannya membeli air itu

setiap hari, itulah definisi bahagia terbaik bagi dia," katanya kepada Kosmo! baru-baru ini.

Beliau yang juga pensyarah Psikologi berkata, fitrah manusia itu memang berkecenderungan kepada kasih sayang kerana setiap orang ada perasaan memiliki.

"Saya berpendapat kita tidak boleh calap perkahwinan itu tidak diutamakan cuma, masing-masing mempunyai dinamik kebahagiaan

yang tidak sama dengan mereka yang konservatif dengan melihat bahagia semestinya ada ibu bapa atau suami isteri.

"Kita tengok sekarang yang ambil anak angkat pun ramai sebab orang percaya, kebahagiaan bukan dengan anak biologi sahaja, malah dengan anak angkat, itu bahagia cara dia, cara bahagia mereka," ujarnya.

Dalam masa sama, Farhana

berkata, mereka yang berusia 35 tahun ke atas serta belum berumah tangga, tidak bermaksud 'malas' mencari pasangan atau 'tidak laku'.

"Orang yang ada jodoh dan berkahwin pun belum tentu bahagia, malah kes bercerai juga meningkat. Jadi bahagia ini lebih kepada individu tersebut, bagaimana dia memaknai kebahagiaan itu sendiri," jelasnya.

Peniaga ternakan itu mengeluh harga tidak stabil **Harga ayam naik RM1 sejak seminggu lalu**

KOTA TINGGI - Pengusaha ayam memaklumkan bahawa harga bekalan ternakan itu telah naik secara mendadak sehingga mencecah lebih RM1 sekilogram sejak seminggu lalu.

Peniaga, Muhammad Siddiq Mohd. Sokran, 27, berkata, harga tersebut naik secara sedikit demi sedikit setiap dua hari di mana pada awalnya hanya 30 sen sebelum kemudiannya naik lagi kepada 40 sen.

"Harga ayam sekarang memang naik mendadak. Ia berlaku sejak minggu lepas lagi. Setiap dua hari naik 30 sen ke 40 sen.

"Sekarang untuk ayam hidup sahaja, harga sudah hendak dekat RM8. Ia berlaku di semua tempat termasuklah di tempat saya.

"Yang kami tahu faktor kenaikan harga ayam ini disebabkan kos makanan sudah mahal. Kami juga difahamkan bekalan ayam sudah kurang kerana banyak di eksport ke Singapura," katanya kepada *Kosmo!* semalam.

Menurutnya dia juga tidak menafikan faktor Pilihan Raya Umum ke-15 (PRU15) yang bakal diadakan tidak lama lagi turut menjadi penyebab kenaikan harga ayam itu.

Sementara itu, tinjauan harga bagi sayur-sayuran di daerah ini mendapati, harga masih kekal sama dan tiada berlaku kenaikan.

Bagi pengusaha kedai runcit, Ahmad Mubarak, 39, berkata, harga sayur tidak menentu, namun pada ketika ini harga sayur



BEBERAPA kawasan di Johor mengalami kenaikan harga ayam standard sejak beberapa minggu lalu. - GAMBAR HIASAN

diterima dari pembekal masih sama.

"Harga sayur masih sama tak mahal sangat dan tak murah sangat. Sawi sampai di kedai kami pada harga RM3.50, jika dulu harganya hampir RM6. Macam sayur

salad sekarang RM5.30, paling mahal sebelum ini pernah cecah harga RM8.

"Kalau harga mahal biasanya bila sayur tak ada stok barulah mereka pemborong naikkan harga," tambahnya.

Amaran menteri kepada pengeluar telur

Pastikan bekalan telur dipertingkatkan untuk pasaran dalam negara

KUALA LUMPUR

Menteri Perdagangan Dalam Negeri dan Hal Ehwal Pengguna, Datuk Seri Alexander Nanta Linggi memberi amaran keras kepada semua pengeluar telur untuk memastikan pengeluaran bagi kegunaan domestik dipertingkatkan bagi memastikan keberadaan bekalan makanan itu dalam pasaran negara.

Ini kerana ketika turun padang melihat bekalan barangan di pasar raya Segi Fresh di Batu Caves di sini pada Ahad, beliau mengakui bekalan telur berkurangan dan perkara itu turut diakui pemilik pasar raya yang menyatakan bekalan komoditi itu sukar didapati disebabkan tindakan pengeluar mengeksport telur gred kawalan iaitu gred A, B dan C ke luar negara sekali gus menyebabkan bekalan telur domestik berkurangan.

"Kerajaan melalui Kementerian Pertanian dan Industri Makanan (MAFI) menjalankan tanggungjawabnya dalam menyediakan dan menaikkan subsidi kepada penternak daripada tiga sen sebiji kepada lapan sen sebiji disebabkan kos pengeluaran meningkat yang memberi kesan kepada pengeluaran telur gred A, B dan C.

"Subsidi yang diberikan kepada penternak ini juga adalah bertujuan memastikan harga kepada pengguna kekal pada harga siling yang ditetapkan kerajaan untuk telur gred



Alexander (kanan) meninjau bekalan telur yang dijual di pasar raya Segi Fresh Batu Caves pada Ahad

A, B dan C," katanya menerusi catatan di Facebook pada Ahad.

Beliau berkata, walaupun penyaluran subsidi, urusan pengeluaran dan bekalan telur tertakluk di bawah bidang kuasa MAFI, Kementerian Perdagangan Dalam Negeri dan Hal Ehwal Pengguna (KPDNHEP) akan sentiasa bekerjasama dengan MAFI dan agensi terlibat bagi memastikan kebajikan pengguna dijaga.

Alexander berkata, pengeluar hendaklah berintegriti dan menunaikan tanggungjawab mereka seperti yang dipersetujui dalam beberapa siri perbincangan selepas subsidi tambahan diberikan kepada mereka.

Mengenai bekalan barangan

menjelang sambutan Deepavali, beliau berkata, bekalan barangan seperti ayam, sayur, minyak dan sebagainya dilihat memuaskan dengan harga jualan mematuhi harga maksimum ditetapkan kerajaan.

Alexander berkata, senarai harga dan barangan di bawah Skim Harga Maksimum Musim Perayaan Deepavali serta tempoh kawalan akan diumumkan kelak.

"Harga ditetapkan adalah munasabah berdasarkan data pergerakan harga barang yang dikumpul secara berterusan oleh Bahagian Penguat Kuasa KPDNHEP dan Bahagian Harga Barang Negara berserta input daripada pemain industri dan agensi berkaitan," jelasnya. - Bernama

Pemborong caj 60 sen bagi sepapan telur ayam disiasat



Penguat kuasa KPDNHEP melakukan pemeriksaan ke atas premis berkenaan selepas menerima aduan berhubung caj pengendalian tersebut.

KLANG - Kementerian Perdagangan Dalam Negeri dan Hal Ehwal Pengguna (KPDNHEP) memeriksa sebuah premis pemborong telur ayam di Klang yang didakwa mengenakan caj tidak munasabah kepada pelanggan.

Ketua Pegawai Penguat Kuasa KPDNHEP Selangor, Mohd Khairi Jamaludin berkata, premis tersebut dikenakan mengenakan caj pengendalian 60 sen bagi sepapan telur ayam gred A dan B kepada pembeli terdiri peruncit.

Menurutnya, pengusaha premis tersebut telah diberikan notis bertulis dan perlu mengemukakan penjelasan berhubung perkara itu sebelum 21 Oktober depan.

"Notis bertulis dikeluarkan di bawah

Akta Kawalan Harga dan Antipencatutan 2011 (AKHAP 2011) dan perlu memberi maklum balas mengikut tempoh ditetapkan.

"Premis berkenaan boleh dikenakan tindakan di bawah Seksyen 21 AKHAP 2011 yang membawa hukuman denda atau penjara atau kedua-duanya sekali jika gagal mematuhi notis tersebut," katanya dalam satu kenyataan pada Ahad.

Beberapa hari lalu tular di media sosial berhubung caj pengendalian jualan telur ayam gred AA sebanyak 60 sen.

Susulan daripada itu, seramai tiga penguat kuasa dari unit antipencatutan KPDNHEP Selangor telah ke lokasi bagi menjalankan siasatan pada Ahad.

Mohd Khairi berkata, premis tersebut

menjual telur ayam pelbagai gred kepada peruncit sahaja dan tiada urusan niaga terus kepada pengguna.

Ujarnya, pemeriksaan mendapati premis berkenaan mematuhi penandaan tanda harga jualan bagi setiap barangan (telur ayam pelbagai gred) yang dijual.

"Bekalan telur diperoleh daripada pengeluar atau pembekal ayam dari Melaka.

"Berhubung pembekal atau pengeluar telur ayam di Melaka pula, KPDNHEP Selangor telah membuat tindakan atau siasatan susulan dengan kerjasama KPDNHEP Melaka untuk memberikan notis kepada pembekal tersebut," jelasnya.

Pencapaian 50 tahun penubuhan jamin kelestarian bekalan makanan negara

Oleh **NURHIDAYAH HAIROM**
SHAH ALAM

LPP terus atur strategi pembangunan

Lembaga Pertubuhan Peladang (LPP) terus mengorak langkah, memperkukuh fungsi, meluaskan perkhidmatan serta mengaturnya strategi membantu kerajaan dalam usaha menjamin kelestarian makanan rakyat Malaysia menjelang 50 tahun penubuhannya tahun hadapan.

Pelbagai kejayaan telah dan akan terus dicapai LPP melalui program-program yang dilaksanakan diseluruh negara termasuk melalui penubuhan Pertubuhan Peladang Negeri (PPN) dan Pertubuhan Peladang Kawasan (PPK).

LPP juga berjaya memainkan peranan sebagai agensi pembangunan kepada masyarakat peladang di luar bandar dengan turut membantu ekonomi pertubuhan agar mampu berdaya saing.

"Menjelang penubuhan LPP 50 tahun, pelbagai kejayaan yang telah dan akan terus dicapai melalui program-program yang dilaksanakan diseluruh negara.

"Di Sabah khususnya, LPP Sabah diwujudkan pada 1 April 1993 dan mula beroperasi sepenuhnya pada 1 Januari 1994 dengan kekuatan bilangan pegawai

LPP seramai 197 orang untuk satu PPN dan 17 PPK.

"Kini, PPK terus berkembang menjadi 26 PPK yang terbentuk daripada 770 unit peladang dan dianggotai seramai 80,184 ahli di seluruh negeri Sabah dengan kekuatan bilangan pegawai LPP seramai 297 orang," jelas LPP dalam satu kenyataan pada Pesta Walet Beluran sempena Sambutan LPP50 di Tapak Tamu Beluran, Sabah yang dirasmikan oleh Menteri Pertanian dan Industri Makanan (MAFI), Datuk Seri Dr Ronald Khande pada Sabtu.

LPP menambah, Program Pemerkasaan Usahawan Peladang yang telah meningkatkan ekonomi hampir 300 orang usahawan menjadi antara bukti kejayaan digerakkan agensi itu bagi pembangunan golongan itu di Sabah.

Selain itu, kejayaan juga boleh dilihat menerusi Program Penyejukan dan Pemodenan Khidmat Mekanisasi dan Automasi Pertanian yang melibatkan perkhidmatan traktor dan jentera dengan keluasan 14,312.238 hektar tanah pertanian.



Ronald ketika melawat gerai pada majlis perasmian Pusat Proses Sarang Burung Walet PPK Beluran.



Ronald (dua dari kanan) merasmikan Pusat Proses Sarang Burung Walet PPK Beluran sambil disaksikan Ketua Pengarah LPP, Datuk Azulita Salim (dua dari kiri).



Ronald disambut ketika tiba pada majlis berkenaan.

"Lapan PPK berjaya mengekalkan Projek Korporat iaitu projek temakan lembu, tanaman nenas, halia, kelapa kacukan, pisang Sabah, pemrosesan pisang Sabah, sayuran tanah rendah, cili fertigasi, sayuran tanah tinggi, durian Musang King dan fertigasi rock melon.

"Sebanyak 15 Pusat Pengumpulan Hasil Pertanian (PPHP), lima Agro Bazar dan tiga Kiosk Jualan Terus dapat dikekalkan," tambah dalam kenyataan itu lagi.

Industri walet

Dalam pada itu, menurut LPP, PPK Beluran telah melangkah setapak lagi dalam industri walet dengan penglibatan di bidang pemprosesan sarang burung walet apabila Pusat Pengumpulan dan Pemrosesan Hasil Lepas Tuai untuk kilang proses walet dengan nilai peruntukan RM1.4 juta telah mula beroperasi.

Katanya, pusat proses tersebut akan memberi manfaat kepada lebih 800 pengusaha sayur burung walet di daerah Beluran, di samping memberi peluang pekerjaan kepada sekurang-kurangnya 50 orang anak-anak peladang di daerah berkenaan.

"PPK Beluran menjadi pusat pembelian dan penjualan sarang burung walet di daerah Beluran dengan penglibatan 250 pengusaha yang berlanggan dengan PPK.

"Pusat pemrosesan ini telah pun beroperasi sepenuhnya dengan kerjasama Syarikat Nestlin Malaysia Sdn Bhd," katanya.

Dr Ronald turut menegaskan industri sarang burung walet ini merupakan satu industri berpotensi besar yang mempunyai nilai eksport yang ketara.

"Industri ini boleh dijadikan sebagai sumber kekayaan baharu untuk negara dan juga mereka yang terlibat dalam pengusahaan berkenaan.

"Beluran ini juga merupakan pengeluar sarang burung walet yang amat ketara di negeri Sabah," tambah beliau.

Untuk rekod, nilai eksport sarang burung walet Malaysia pada tahun 2021 adalah RM1.8 bilion (kenaikan lebih RM400 juta berbanding tahun 2020) manakala nilai eksport bagi tahun 2022 setakat September 2022 adalah RM1.21 bilion.

Pada majlis sama, turut berlangsung sesi menandatangani Memorandum Persefahaman (MoU) Pemasaran Walet di antara Pertubuhan Peladang Kawasan Beluran dengan Syarikat Nestlin Sdn Bhd.

Jelas LPP, MoU yang bernilai RM20 juta untuk tempoh lima tahun itu bakal memberi tumpuan kepada lima aspek iaitu perkongsian kepakaran, strategi pengurusan, perkongsian infrastruktur, khidmat nasihat dan pemasaran hasil.

Selain itu, turut diadakan penyerahan simbolik cek kepada PPK Beluran (Insentif Jentera dan Peralatan Kecil Pertanian, Program Agripentice dan Program Peningkatan Aktiviti Akuakultur), SMK Beluran (Program My Green Team), Usahawan AgroPeladang Peladang dan penyerahan kit MAFI Prihatin.